

## **Nyovara Wao Manasyin Paulus Po Ratoe Timotius Ai 1 TIMOTIUS**

### *Paulus po kove ranutu to irati Timotius ai*

<sup>1</sup> Risyirati Paulus, syo nyovara waowe so ratoe irati sya arikainyo Timotius winai. Risyamo Yesus Kristus po inatutir indamu syo Apa ayaowe raura. Amisy, wepirati po wansapaya irati ayao kakaije rai, Po inapatimu indamu syo anakere so raijar, muno Yesus Kristus, wepirati wansanaveano amen, Po inapatimu tavon. <sup>2</sup> Timotius, winyamo maisyare taune sya arikainye pi winy, weye wusyinoe syo nanyao indamu nyanave Yesus ai. Syare muinye muno kove muno saumane no no Injayo Amisy muno wama Amisy Yesus Kristus no wasautan tenambe.

### *Wasyisyaube kuruno angkari mansai*

<sup>3</sup> Timotius, ribeker indamu wino tawan no munijo Epesus. Omamo syo raura nai tavon to arono nandijawe syuje indamu syanya ride no propinsijo Makedonia so rai. Weye vatano nanawi ratu-ije inta wo ananyao angkari raugaje, weti syare nyo mansopi. <sup>4</sup> Muno vemo wo ayao umano mbe tugaive jewene muno ayao aneno wusyine ratantona tutir inya, weye vatane wo ayao namije ratantona vayave, weamo wayaowi vayave. Weti anakotare umaso mo mauga ti wo Amisy apa bekere rarijate ramu, yara wama anave wemi mo wansauga ti wamo Apa bekere raen ti wandarijat.

<sup>5</sup> Ananyao somamo syo raugaje indamu wamuinyo wasai vambinibe. Muinye mamamo ntipu no wansanuga rai arono wamanave Yesus ai tugaive, muno ntipu arono wansanuga ngkakavimbe yara ana ngkakainoanive inta raen no rai ramu. <sup>6</sup> Weramu kurune inta wo ananyao so rapaya ti ntami to, yara soamo utavondijo ayao ama ine meweno raije obo rai. <sup>7</sup> Ubeker ube kurumbe wo Ananyao Musa ranyao vatane mai, weramu unanta taune awa ayaowe rai jewen. Wo raura ware wo Ananyao Musa raen dave, weramu wo raene ramu.

<sup>8</sup> Wandaen ranivara vatane utavondi Ananyao Musa rai mamaisyo Amisy e apa bekere rai, weamo ananyao wato ngko dave. <sup>9</sup> Wandaen tavon Ananyao Musa mamamo raugaje irati vatano awa ana udave mamai no Amisy amune rai maije ramu. Yara Ananyao Musa mamamo raugaje irati vatano maisyare so mansai: vatano nanawirati wo ananyao rakanyoandi muno wonayo rai; vatano ubeta Amisy e aije jewen muno wo ayao kakaije rave; vatano usambayambe jewen, yara utavondi ayao mine so bo rai; vatano wo awa ajae awa akoe maubaisy, muno vatano wo vatano kaijinta maubai tavon; <sup>10</sup> vatano anaerere ugavo mansai; anya utitarive anya taune mansai; vatano wo vatano kaijinta maijaro arove wo mansamavun; vatano aarurijate ntapekano mai muno wo vatane maponae; muno vatano wo ayao kakai kaijo rui vayave rave ti mo ananyao nsarokire ramaisy e jewen. <sup>11</sup> Ananyao nsarokire mamamo mo Ayao Kovo Yesus Kristus ramaisy. Amisy, opi titi

rave ti wamo ararimbe, Po Ayao Kove so raugaje rinai indamu syo ravov.

*Paulus po kove raura seo Amisy e aijo Apa muinye rai*

<sup>12</sup> Risyo kove raura seo wama Amisy Yesu Kristus ai, weye panave rinai ti Po inapatimugo Apa anakere so rai. Wepirati po vambunine raunande rinai indamu syo Apa anakere rajar. <sup>13</sup> Weramu arono wusyinoe syo Yesu Kristus aura tantunawi muno risivuin dave, syo arare veano vatano wanave Aije mansave. Sya ana dave umaso ngkakai tenambe, weramu syantukambe weye syanave Yesu ai rainy, weti Amisy e aemeno rinai. <sup>14</sup> Wakoe, wama Amisy e bekobe rave rinai! Po apa kove raugaje rinai ti manakoe, muno anave muno muinye tavon, omamo nori rati Yesu Kristus ai. <sup>15</sup> Ayao wamanave rajije no taiso: Yesu Kristus de no mine vone so rai indamu Po vatano wo ayao kakai rave mapaya awa ayao kakaije ama mangke rai. Muno risyamo sya ayao kakaije ntapekan dave, mo vatano kai awa rakivan bintabo. <sup>16</sup> Weramu wemi mbewar Amisy e bekobe rave rinai, wirati vatane wo raen ware, “Paulus apa ayao kakaije ntapekan dave, mo vatano kaijinta awa rakivan, weramu Yesu Kristus atawandi rai rave.” Maisyare omaisy, ribe unanuive vatano nanawije mansai indamu unande wanave Yesu Kristus ai ti awaveo kovo nuge nuganuije rai.

<sup>17</sup> Weti wamo Amisy e ararimbe muno wamo aura titive weye Opirati wama Akarijo Titi be akarive nto a nuge nuganui. Opamo wene nde Ai jeben, muno vatane wo aeno mansamije rai

jewen tavon. Obo pirati Amisyé piye, ti wamo ararimbea nuge nuganui. Amin.

<sup>18</sup> Sya arikainyo Timotius, anakero syo raugaje somamo Amisyé apa anawae inta wo raurairive winai arono tumo nandijawe. Syare Amisyé apa urairijo namije mo vambunine raunande nai indamu nyo Amisyé apa marova mansopi tenambe. <sup>19</sup> Nyare nyo mansopi, weamo nyo nya anave Kristus aije rajar matuve muno wimbeto ana ngkove obo rai indamu nanuga ngkakavimbe ti ana ngkakainoanive inta raen no nai ramu. Weye vatane inta nawirati wo ana ngkove raen no manuga rai, weramu wonae ti wo rarijate ramu. Maisyare omai ti, awa anave randamisy. <sup>20</sup> Imeneus muno Aleksander maisyare wemaisy. Weti syo mangke raugaje yai, syo yau-nanta no Anakakai Akoe ai indamu yo raen vemo yo Amisyé aura tantunawi jakato inya.

## 2

### *Ananyao raugaje arono vatane wanugan ube sambayambe*

<sup>1</sup> Soamo syare syo ananyao raugaje irati anugano Amisyé wasai. Manasyimbe, syare wasambayambe vatan tenambe mansai, wapo Amisyé anajo indamu Po kove raugaje mai, muno wapo kove raura seo Amisyé ai. <sup>2</sup> Syare wabe sambayambe akarijo titi muno akari kaijo rui vayave mansai tenambe no mine vone so indamu saumane bo mi nowo wama munije rai tenambe, wirati wantavondi Amisyé ai ngkov muno wamo ana mamaisyé rave. <sup>3</sup> Wansambayambe tai

maisye omamo ngkov, mo Amisye anuga raveti ranayanambe. Wepirati po wansapaya ayao kakaije rai, <sup>4</sup> muno beker indamu vatan tenambe nawamo Po mansapaya irati ayao kakaije rai muno unanta irati Apa ananyao tugae rai.

<sup>5</sup> Amisye pamo intabo pa. Muno Po Vatan intabo apatimu indamu be marimbe Amisye ai muno vatane mansai. Vatane sopamo Yesus Kristusa pije. <sup>6</sup> Wepirati po anasine raunandea kakai indamu Po vatan tenambe mapaya irati ayao kakaije rai. Apa kakaije umaso nande arono masyoto Amisye po rapatimu rai, indamu Amisye po raroron kakavimbe beker Po vatan tenambe mapaya irati ayao kakaije rai. <sup>7</sup> Wemi mbewar ti Yesus Kristus po inapatimu Po inatutir indamu syo Apa Ayao Kove ravov muno syo vatano Yahudi jewene mansanyao indamu wanave Ai muno unanta Apa ananyao tugae rai. Sya ana syo raura umaso mamu tugae, syangkarive ramu.

<sup>8</sup> Arono vatano wanave Yesus aije wanunugambe no rui rui vayave, ribeker syare vatano anya wo maneme rajaseo ti usambayambe, manuga ngkakavimbe rautan. Weramu vemo wayaowi nora muno pariye inta ntami no mansanuga rai nora.

<sup>9</sup> Muno vatano wanya nanawamo syare vemo wo manakea ramarandine obo ratantona nora, ✧ maisyare makarivuinye rairi ti ngko dave wemaisy. Muno vemo wo anakotaro raonijo ama mangke nseo rave inta rangkion nora, maisyare emasije, mutiara wemaisy. Vemo wo ansuno ama mangke nseo ti ngko dave inta rave nora,

---

✧ 2:9 1 Petrus 3:3-4

yara syare wo awa ansuno mamaisyi vayave bo rave. Weye wanya ubekero vatano kaijinta mami ntami mansai, weamo ngkove ramu. <sup>10</sup> Yara syare awa ana udave ngkov wemirati vatane mami ntami mansai, indamu mamaisyo wanya wo Amisye asyanive mansamaisy. <sup>11</sup> Arono kurune po ananyao raugaje irati anugano Amisye wasai, syare wanya umanin bayave wo raraniv, manuga mpaaje rautan. <sup>12</sup> Syo wanya mansamayararo wo ananyao raugaje irati anya mansai jewen muno vemo ube akarive anya mai jinya, yara syare umanin bayave. <sup>13</sup> Weye arono wusyinoe Amisye po Adam anarijo wusyin, umba Po Hawa ranarijo rijabe. <sup>14</sup> Muno tawae mo Adam aponae jewen, yara Hawa omi tawae mo raponae, weti wanya omirati mo Amisye apa ananyaowe rakanyoandi to. <sup>15</sup> Weramu indati Amisye po wanya mapaya irati awa ayao kakaije rai weye wo arikainye mavaki. Weti ranivara wanya wanave Yesus ai tutir muno ubekobeo vatane mai, manuga ngkakavimbe muno mpaaje rautan, wea indati Amisye po mapaya kakai rai.

### 3

#### *Vatano ube akarive anugano Amisye rai*

<sup>1</sup> Ayao wamanave raije no taiso: Vatan inta beke dave pare be akarive po anugano Amisye maugav, weamo anakero beker po raijare umaso ngko

dave.\* <sup>2</sup> Are pirati be akarive po anugano Amisye inta maugav, apa ana dave ratodi tenambe no so:☆ Syare apa ana po raveye ngkov, indamu vemo vatane wo aura tatugadi nora. Apa wanya po raovane mammo intabo rave. Po taune apa ana daura, apa ana dave raeranande indamu vemo po ayao kakaije rave nora. Vatane wo aura titive weye apa ana daveye mamai dave. Arono vatano marane ude, po mansaugav usen no apa yavar. Arono pananyaube, apa ayao mammo nsarokir muno mbar. <sup>3</sup> Weramu vemo maeno awije rai nora. Vemo po sivuinye rave vatane mai nora, yara anuga nsaumano mai tenambe. Vemo payaowi nora. Vemo anuga nto irati doiye rai nora. <sup>4</sup> Syare vatane wato be akarive taune apa yavaruga mai ti mamaisy. Po apa arikainye manyao indamu ubeta apa ayaowe rai. <sup>5</sup> Weye are pirati pantukambe be akarive apa yavaruga mai, weamo vemo be akarive anugano Amisye rai jinya! <sup>6</sup> Syare opamo vatano panave Yesus ai nugoenta to indamu apa anave matu. Weye vatano apa anave kamurama nene pamo ranivara wapavave wapo aijaseo be akarive, indati ararin dave. Wea umba Amisye po mangke raugaje ai, maisyare muno Po mangke raugaje Anakakai

---

\* **3:1** Anugano Amisy wo vatane inta mapatimu indamu ube akarive wo anugano Amisye maugav (anemo 2-7), muno wo vatano kaijinta mapatimu indamu wanapatambe anugano Amisye mai (anemo 3-13). Akarijo wo anugano Amisye maugav onawamo wo Ayao Amisye raura kakavimbe irati vatano wanave Yesus aije mansai muno wo manyao. Yara vatano wanapatambe anugano Amisye mai onawamo wo anugane ama doiye raeranande muno wo wanya kavinije maeranande muno wo anakere kotaro kove raijar. ☆ **3:2** Titus 1:6-9

Akoe ai wemaisy. <sup>7</sup> Syare vatano be akarive apa ana daveye ngko dave tenambe, ti vatano nanawirati wantatukambe Amisye aije wo aura titive. Yara ranivara apa ana dave ngkove jewen, weamo vatane ware wo aura tantunawi, muno indati Anakakai Akoe po atopan ti Amisye apa anakero po raijare mbea marudi.

*Vatano wanapatambe anugano Amisye mai*

<sup>8</sup> Vatano nanawirati wanapatambe anugano Amisye mai awa ana udave ratodi tavon no taiso: Syare awa ana udaveye mamai dave ti vatane wo maura titive. Vemo wangkarive nora, muno maeno awije rai nora. Muno vemo wo vatane mansaponae inda wo doiye ratande mai nora. <sup>9</sup> Syare ananyao tugae wemi Amisye po raro-rono wansai mammo wo raijar matuve, manuga ngkakavimbe rautan. <sup>10</sup> Nyare nyo vatane inta maijaseo wanapatambe anugano Amisye mai, weamo syare nyo awa anaube raen wusyimbe rati. Umba ranivara ana ngkakainoanive inta raen no mai jewen, wea umba wapo maijaseo wanapatambe anugano Amisye mai kai.

<sup>11</sup> Maisyare wemai tavon, awa wanya onawamo awa anaube mamai dave tavon, ti vatane wo maura titive muno wanave mai anakotare rai tenambe. Vemo wanya umaso wo vatano kaijinta maura tatugadi nora. Yara syare wo awa ana uaura muno awa ana udaveye raeranande indamu vemo wo ayao kakaije rave nora.

<sup>12</sup> Syare vatano panapatambe anugano Amisye maije umawe apa wanya po raovane mammo intabo rave. Muno be akarive apa arikainye



mai muno apa yavaruga mai tenambe ti ma-  
maisy. <sup>13</sup> Arono vatane umaso awa wanapatambe  
anugano Amisyé mai omamo ngko dave, weamo  
awa arakove wo maura titive. Muno vatano  
wanapatambe umaso ubambunin wo awa anave  
Yesus Kristus aije raura vambunimbe.

*Ananyao Amisyé tugae raijar matuve*

<sup>14</sup> Sya arikainyo Timotius, kavinta nakato  
ribeker syare syo napan no Epesus. Weramu syo  
ayaowe so ratoe syo ranutugore nai wusyimbe,  
<sup>15</sup> indamu ranivara ana inta mo rinansopi ti ide  
maneai, weamo nyo raen ti nyo vatane manyao  
indamu awa ana udave mamaisyó yavaruga  
Amisyé waine rai. Weye anugane wamamo  
Amisyó noa pitawabe Apa yavaruga nawirati  
wam. Muno anugane wamirati Amisyé po apa  
ananyao tugae raugaje wansai indamu wamo  
raijar matuve muno wamo raeranande kobe  
indamu vemo ayao angkari inta nande rai jinya.†

<sup>16</sup> Amisyé apa ananyao tugae mamó ngko dave,  
wemirati ngkokaiibe no wusyinoe weramu soamo  
Po raroron to no taiso:  
Yesus Kristus paje no mine so rai be vatanbe;  
Anawayo Vambunine mo aroron mare Opamo  
mamai dave;  
Naito Amisyé wo aen to;  
Apa Ayao Kove mamó ravov no munije raita  
tenambe;  
Vatano wanui wanave Ai to;

---

† **3:15** Ayao Yunani naiso mo raura mare anugano Amisyé mo  
Amisyé apa ananyao tugae raijar matuve omamo raurata irati ajije  
rauseo ntet indamu yavare ntuna rai matuve.

Amisye po aijaseo no munijo ntiti rai jakato.

## 4

*Kuruno angkari wo anugano Amisye mansaponae*

<sup>1</sup> Anawayo Vambunine mo raura kakavimbe mare arono munije ama akari mararai, indati vatan inta nawirati wo ananyao tugae rapaya ti ntami, yara wo anawayo kakaije raraniv ti utavondi awa ananyao angkarije bo rai.

<sup>2</sup> Ananyao angkari umaso mammo kurune inta nanawirati wo raugaje anugano Amisye mansai. Kurune wato awa angkarije ntapekan. Mansanuga ngkaumur ti usamane awa ayao kakai raije ramu. <sup>3</sup> Awa ananyao angkari maisyare so: ware vemo vatane ubaunam inya, muno ware anaisye inta mammo raisyisyi.

Weramu syo raura wasai syare anaisyo namije mammo Amisye pi po ranari ti Po raugaje indamu wandaisy. Weti vatano wamanave muno wananta ayao tugae rai, wamo kove raura seo Amisye aijo wama anaisye rai umba wandaisy.

<sup>4</sup> Tugae, anakotaro Amisye po ranari omamo ngko tenambe. Anaisye inta raisyisyi jewen. Maisyare omai ti, wamo kove raura seo Amisy ai, weamo anaisye kotaro rui vayave wamo rai kaija.

<sup>5</sup> Anaisye mammo ngko tenambe weye wamo kove raura seo Amisye aijo rai muno Apa ayao mo inta raura raisyisyije jewen.

*Vatano panapatambe Yesus Kristus ai ti ngko dave*

<sup>6</sup> Timotius, ranivara nyo ayao umaso ranyao tenambe irati arakovo wanave Yesus Kristus aije mansai, wea umba nyanapatambe Yesus Kristus ai mamaisy ije. Nanuga ntubai mbambunin weye wino tawan no wama anave ama ayaowe rai muno ananyao ngkove rai, wemirati wintavondi raija nugoenta to. <sup>7</sup> Vemo nyo ayao umano mbe tugaive jewene ratantona nora, weye mo kove inta raunande ramu. Yara syare nyo taune nanuga ravera mbambunin indamu wintavondi Amisye apa bekere rai kobe. <sup>8</sup> Wamare wamo wansanasine raeranande indamu mbambunin, wemamo mo kovo mamaune raugavo wansai. Yara wamare wamo wansanuga ravera mbambunin indamu wantavondi Amisye apa bekere rai tenambe, wemamo mo kovo manakoe raugavo wansai, weye Amisye po kove raugaje wansai no mine vone so muno Po kove ratayao tavon ti mo wansanyut no munijo ntiti. <sup>9</sup> Ayao umaso tugae, syare wamanave rai. <sup>10</sup> Maisyare omai ti, wamo anakero Amisye raijar panyoambe weye wansanaveano Amisyo noa pitawabe obo amen, Opi po vatan tenambe mapaya ayao kakaije rai, nde terave vatano wamanave Ai wansai.

*Paulus po ananyao inta raugaje Timotius ai*

<sup>11</sup> Timotius, syare ananyao umaso mamamo nyo raugaje tenambe indamu vatane utavondi rai. <sup>12</sup> Ranivara vatane inta wo naura tatugadi weye winyamo vatano ngkamurama nene, vemo winsamane nora! Yara wimbe unanuive irati vatano wanave Yesus aije mansai. Syare nya ana ndaura, nya ana ndave, nya muinye, nya anave, muno

nanuga ndandinit, mbe unanuive mai indamu wo narijat tenambe.

<sup>13</sup> Syare nyo anakere so raijar tutir ava risyirati Paulus syakaore: wimbacave Ayao Amisye rai no anugano Amisye mansamun, nyo ama ine raura kakavimbe mai, muno nyo mansanyao. <sup>14</sup> Mbemo nanimari kovo vambunino namirati Anawayo Vambunine mo raugaje naije rai nora! Kovo vambunine wato nande nai arono nandijawe anawae inta wo Amisye apa urairi dapatimu nai raura nai muno akarijo wo anugano Amisye maugave wo maneme rajaseo ntamijo nai. Maisyare omai ti, syare nyo kovo vambunine wato veano anakero Amisye raijar.

<sup>15</sup> Syare nyo Amisye apa anakere so raijaro panyoambe indamu vatan tenambe wo raen wo raura ware nya ana ndave ti ngko dave miridi nseowa. <sup>16</sup> Syare nyo nya ana ndave muno nya ananyaowe raeranande kobe indamu mamaisyo Amisye apa bekere obo rai. Natawandi tutir, weye indati Amisye po napaya irati ayao kakaije rai muno Po vatan wo nya ananyao raranive mapaya ayao kakaije rai tavon.

## 5

### *Anugano Amisy mamu maisyare taune wama yavaruga ramaisy*

<sup>1</sup> Timotius, syare vemo nyo anya vatan anui manyao soowabe nora, yara nya ananyao ma ndaura saumambe mansai maisyare muno taune winye nya injaya pe ripayao wemaisy. Muno nyo anya kamurame manyao maisyare onawamo

nya arakove nawije. <sup>2</sup> Muno wanya vatan anui wenawamo nangkoe nawije, weti nyo ayao maisye bo mi ndaura nanto mai. Wanya kamuram onawamo nya aname nawije, weti vemo nanuga ntento mansai nora, yara syare nanuga ngkakavin bintabo.

*Ananyao wanya kavinije mansaeranande*

<sup>3</sup> Naiso syo ananyao wanya kavinije raugaje nai. Wanya mbe kavinive to umba obo no terave, weamo syare wapo raeranande. <sup>4</sup> Weramu wanya kavini wemirati ama arikainye, awa ajavi nawa una ivae, weamo ridaura ra wo ranaun: taune wo wanya kavini so raeranande, maisyare arono ta ube arikainye tuvambe, awa vatan anui muno awa anene wo maeranande wemaisy. Weye kove mammo utavondi Amisy apa bekere rai manasyimbe no taune awa yavaruga rai. Wemamo mo Amisy aveti anayanambe. <sup>5</sup> Wanya kavini inta mi obo no terave kobe, ama ajavi muno ama arikainye jewen dai, weti kavini so ranaveano Amisy obo amen. Namane rinit mbe sambayambe Amisy ai indamu Po raeranande. <sup>6</sup> Weramu wanya kavini inta onawamo manasine ama mbekere obo mi wo ratantona. Wamerananta ukovo manakea bo rai weramu manuga ma mpamo to, weye nggwaravainyo Amisy ai. <sup>7</sup> Syare nyo ananyao so raugaje irati wanya kavini muno awa yavaruga mansai tenambe indamu utavondi rai, inda vemo vatano kaijinta wo mansaura tatugadi nora. <sup>8</sup> Yara are pirati ponayo po apa vatan anui muno taune apa yavaruga maeranande, vatano napije po apa anave Amisy

aije rapaya ti ntami to. Apa ana dave wato ngkakai, mo vatano wantukambe Amisye aije awa ana udave ti ngkakai rakivan, weye vatano wantukambe Amisye aije wo taune awa yavaruga maeranande ivae.

<sup>9</sup> Wanya kavini awa yavaruga inta raen akato jewen, syare nyo awa tame ratoe indamu anugano Amisye wo mansaeranande. Weramu wanya kavini awa tame ratoe tenambeye jewen, yara nanawirati awa ana no mansai ratodi maisyare so: Syare ama tume mo tumo tename mandei rakivan to muno wusyinoe ama anya mo aovanoe pamo intabo dave. <sup>10</sup> Syare ama ana ndave ngko dave, ti vatan tenambe wo raura titive. Weti ama ana ndave ngkove maisyare so: Mo arikainye maeranande ngko dave; mo vatane maugave usisa no ama yavar; manapatambe irati vatano wanave Yesus aije mai;\* mbekobe irati vatano mansanimaumbe mai; muno mo anakere kotaro kove rave tutir.

<sup>11</sup> Weramu wanya kavinijo kamurame nanawamo, vemo nyo awa tame ratoe indamu anugano Amisye wo maeranande nora. Weye kamuram ti ranivara awa bekero ubaunam akato ntiti rave mo awa bekero utavondi Kristus ai rakivan, indati ubaunam akato. <sup>12</sup> Arono mbe kaviniveowe, mo raura patimuve mare manapatambe Kristus obo ai. Weramu ranivara mbaunam akato, weamo mo ama urairije umawe rakanyoandi, weti Amisye pariyo wanya namije rai. <sup>13</sup> Ranivara wanya

---

\* **5:10** Ayao Yunani naiso mo raura mare, “wanya kaviniye mo vatano wanave Yesus aije majoe rarandom.” Ama ine mamo manapatambe mai.

kavinijo kamurame awa tame ratoe indamu anugano Amisyeye wo maeranande, indati wanya umaso wononae vayave. Wo taune awa anakere rajare ramu, yara manayanambe usea waje awa arakove awa yavare rai, ti wo awa arakove awa anakere ransosobe. Wayao ampambe muno wo ayao mamaisyeye jewene ravov. <sup>14</sup> Maisyare omai ti, syare koveamo wanya kavinijo kamurame ubaunam akato kai, wo arikainye inta maen muno wo awa yavaruga maeranande. Indamu vemo vatano manuga mamuno vatano wamanave wansai wo wansaura tatugadi jinya. <sup>15</sup> Weye wanya kavinijo kamurame inta makirive Kristus ai to, yara utavondi Anakakai Akoe ai.

<sup>16</sup> Ranivara wanya muno anye wanave Yesus Kristus aije awa arakovo yavaruga inta mbe kavinive to, weamo syare yavaruga taune wo raeranande kobe, yara vemo anugano Amisyeye wo raeranande nora. Indamu anugano Amisyeye wo wanya kavinijo tugae, obo no terave, maeranande weye awa yavaruga inta no marijat akato jewen to.

*Ananyao vatano ube akarive anugano Amisyeye rai*

<sup>17</sup> Akarijo nanawirati wo anugano Amisyeye maugav ti ngko dave, syare wapo romano raunande maije ravera nseo, nde terave akarijo wo Amisyeye apa ayaowe ravov muno wananyaube mansai.

<sup>18</sup> Weye Ayao Amisyeye mo ratoe mare, “Winyare nyo sapije inta auga damu po anakero nawaisyeye rajar, vemo nyo aoraijo po kasyambero no no nawaisyeye namije inta raisy inya. Yara po rai kai

weye po anakere raijaro panyoambe.”✧ Muno Ayao Amisye mo ratoe tavon mare, “Vatano panapatambe nai pamo nyo doiye raunande ai indamu mamaisyo apa anakere rai.”✧ Maisyare omai ti, syare anugano Amisye wo akarijo po mansaugav aeranande inda apa doiye mamaisy.

<sup>19</sup> Ranivara vatane inta po raura pare akarijo po anugano Amisye maugave inta po ayao kakaije ravea, weamo vemo wapo ayao namije raraniv inya. Vatan intabo dave panaikebe ai, weamo mamaisye ramu. Yara vatane jirum dako mandei dako wo raura ware akarije wato po ayao kakaije inta rave to, wea umba wapo awa ayaowe raraniv. <sup>20</sup> Umba wapo akarije wato apa ayao kakaije raura kakavimbe no vatano una no anugano Amisye mansamun tenambe indamu ujaniv ti vemo wo ayao kakaije inta rave tavon inya.

<sup>21</sup> Timotius, syare nyo raurairive no Amisye muno Yesus Kristus muno naito uno no munijo ntiti mansamun, nyare nyo ananyaowe so rarijat tenambe. Vemo nyo vatane inta mansamamaribe nora, yara vatan tenambe nawamo nya ana ndave ngkovo mai vintabo.

<sup>22</sup> Vemo nyavave nyo vatane inta aijaseo be akarive anugano Amisye inta rai nora, weye ranivara vatane wato po ayao kakaije rave, wea indati vatane uparijo winye vatano napije pe risai kava. Yara syare nyo vatane wato apa ana dave muno apa ayaowe raen dati, wea umba nyo naneme raijaseo ntamijo ai indamu be akarive. Muno

---

✧ 5:18 Ulangan 25:4 ✧ 5:18 Matius 10:10; Lukas 10:7



nyo taune nanuga, nanasine raeranande indamu ngkakavin bintabo.

<sup>23</sup> Timotius, wanyati nJORAMA, weamo vemo nyo mana bo ramanam nora. Yara nyo angguri kavinta ramanam, wemirati mamaisyo wanyati nJORAME rai wirati nsauman.†

<sup>24</sup> Vatane inta awa ayao kakaije mamO WAMO raen kakavimbe, ti wandaen awa mangke indati nande mai. Yara vatano kaijinta awa ayao kakaije soamo ngkokai-beve, weramu indati raro-ron kakavimbe no masyoto rijat. <sup>25</sup> Maisyare omai tavon, vatane inta awa ana udave ngko dave mamO WAMO raen kakavimbe. Yara inta awa mamO soamo ngkokai-be ti wamantatukambe rai, weramu masyoto makare indati raneka vintabo.

## 6

*Ananyao raugaje vatano wanave nanawirati wanapatambe akari mai*

<sup>1</sup> Syo ananyao so raugaje irati vatano wanave Amisye ai nanawirati wanapatambe akari mai: Syare wadanide! Wabeaje wapa akari mai, indamu vemo vatane wo wama Amisye aura tantunawi nora muno wo wama ananyao raura tatugadi nora. <sup>2</sup> Muno ranivara weapamo inta nya akarije panave Kristus ai tavon, vemo nyo aura tantunawi nora, weye winye wepe wuribe arakobe no Kristus ai. Syare nyanapatambe ai kobe muno nyo ravera miridi nseo, weye nyo raen

---

† 5:23 Anggurije mamO maisyare awijo mamOane ramaisye ramu. Anggurije mbe obative Timotius ai weti po kavinta vayave ramanam, weramu po ramanam ava maeno rajje ramu (1 Timotius 3:3).

nya anakere mo kove raunanto vatano panave wato ai, muno opamo Amisye muinyo ai tavon.

*Ranivara vatane wananyaube kobe ramu yara wo doije bo rakani, weamo mamaisye ramu*

Inya, Timotius! Ananyao syo ratoe nyovara waowe so rai, syare nyo raugaje vatano wanave mai muno nyo mansanyao indamu utavondijo rai tenambe. <sup>3</sup> Weramu kurune inta wo ananyao angkari raugaje, omamo mamaisyo wama Amisy Yesus Kristus apa ananyao kove raije jewen muno nsasye irati Amisye apa ananyao tugae rai. <sup>4</sup> Are nawirati wo ananyao angkari raugaje onawamo vatano mararin dave muno vatano wantatukambe nawa. Manayanambe wayaowi ayao omane intabo jirum ndako ama ine rai muno anakotaro rui vayave rai. Weaveti vatane upari ti usasivuiny, wo awa arakove maura tantunawi, muno awa ana wo ratantona mamun irati vatano kaijinta mai. <sup>5</sup> Warare mansai vambinibe tutir weye awa ana wo ratantona ngkakai muno wo ayao tugae raene ramu. Wo rakarae ware, “Ranivara wamanave Amisye ai, weamo wamo doije ratande wansai manui rave.” Ayao wato mamaisye ramu!

<sup>6</sup> Yara tugae mamu ranivara wamanave Amisye ai ti wamare, “Ananugo rui mamaisyo rinai, namije nto,” wemirati mo kovo manakoe ratande wansai. <sup>7</sup> Arono wansano no mine vone so, wamo ananuge inta raugavo wansarijate ramu. Ti noa wamunen, wamo ananuge inta raugavo wansarijat akatoe ramu. <sup>8</sup> Weti ranivara wama anaisye muno wama ansune mamaisy, weamo wansanayanambe. <sup>9</sup> Are pirati beker pare apa

ananuge nseowa manui, apa bekere wato mo taune aponae muno mo atopan. Apa bekere mamu ngkakainoanive vayave, weramu pantatukambe rai, ti mo augav manawadi po kakai raronto kobe. <sup>10</sup> Weye vatane manuga ntento doiye rai mo mauga ti wo ayao kakai rui vayave rave. Muno vatane inta ubekero wo doiye bo rakani ti wo awa anave Yesus Kristus aije rapaya ti ntami to.

*Ananyao raugaje Timotius ai*

<sup>11</sup> Weramu, sya arikainyo Timotius, winyamo Amisye apaura nai, weti syare nggwaravainy irati ayao kakainoanive umaso rai tenambe, yara ntavondi ana mamaisy muno ana ngkove obo rai. Syare wimbeke dave indamu nya ana ndave mamai no Amisye amune rai muno wintavondi Apa bekere rai, nyanave ntindimuve Ai muno natawandi kobe, nyo muinye rarorono vatane mai muno nyayao saumambe mai. <sup>12</sup> Syare wimbambunin nyo Amisye apa anakere ransui tutir ava winyaura irati kovo nuge nuganui namirati Amisye po raurairive najoe rai. Weye Amisye po nawain indamu nyaura kovo nuge nuganui rai arono wusyinoe nyo raura no vatano wanuije mansamun nyare, “Risyamo syanave Yesus Kristus ai.”

<sup>13</sup> Syare nyo raurairive no Injajo Amisye amun, wepi po vatan tenambe wansanawayoe raunande ti wangkov, muno nyo raurairive no Yesus Kristus amun, wepirati arono tet no Pontus Pilatus amune rai Po ayao tugae raura vambunimbe ai. Syare nyo raura patimuve indamu <sup>14</sup> nyo ananyaowe so rarijat tenambe, nanuga ngkakavimbe rautan,

indamu vemo vatane inta po naura tantunawi jinya. Wimbeto ananyaowe so rai tutir ava masyoto wama Amisy Yesus Kristus pakare rai. <sup>15</sup> Apa masyoto pakare raije mammo Amisye pi po rapatimu.

*Amisye ararimbe*

Amisye obo wamo ararimbe,

Webo pirati be akarive mine so rai tenambe.

Opamo Akari Titi po akarijo titi makivan tenambe,

muno Akari No Vombe irati akari una no rui rui vayave mansai.

<sup>16</sup> Webo pirati noa nuge nuganui,

tuna no varo mbaduru dave, weti vatane wo asyaniv.

Vatan inta po aen to jeben bayave,

muno vatane wo aeno mamije rai kakai.

Maisyare omai ti wamo aijaseo vombe,

wamare Apa vambunine ntoa pitawabe.

Amin.

*Vatano awa ananuge manui rave, vemo mararin nora*

<sup>17</sup> Ribeker syare nyo vatano awa ananuge manui no mine vone so manyao indamu vemo mararin nora. Muno vemo wanave awa romane rai nora, weye omamo no tawane ramu. Yara syare wanave Amisye ai muno manaveano Webo amen. Weye Wepirati po anakotare raugaje tenambe ra mawes, indamu wansanayanambe rai. <sup>18</sup> Syare nyo vatano awa ananuge manuije wato manyao indamu wo ana ngkove rave. Awa ananuge manui weti syare awa ana udave ngko dave mammo manui tavon. Vemo waradaive awa

ananuge rai nora, yara wo inta raunanto vatano kaijinta mai, muno wo awa doije raunande manakoeve tavon. <sup>19</sup> Ranivara wo anakotare umaso rave, omamo maisyare wo kovo manakoe ratayao taune mansai no nugo makanande, weye Amisye po kove ratayao ti ntuna mo mansanyut no munijo ntiti. Indati awaura irati kovo nuge nuganuije rai, omirati kovo tugae mije.

*Nyovara waowe ama maran*

<sup>20</sup> Timotius, sya arikainyo winy, Amisye po apa ananyao tugae raugaje nai indamu nyo raeranande, weti nyo raeranande kobe indamu vemo ayao angkarije nsiso ananyao tugae umaso rai jinya. Arono rui nyo vatane maraniv wo ayao mino ama ine meweno raije so raura, vemo wintavondi mai nora. Muno arono vatane awa ana udatantona ti ware omamo ntiti weramu mamaisye jewene ma, weamo nakirive mai vayave. <sup>21</sup> Ayao angkarije umaso mamamo vatane inta wanave rai to, ti wo Amisye apa ananyao tugae rapaya ti ntami to.

Amisye apa kove no wasautan tenambe.

*Risy,  
Paulus*

**Ayao amisy urairi wanyin**  
**New Testament in Yawa (ID:yva:Yawa)**  
**Perjanjian Baru di Yawa**

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yawa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files  
dated 29 Jan 2022

f32aa90e-2509-5f04-a3ab-17abf547cfde